

Atvinnuvega- og nýsköpunarráðuneytið,
Skúlagötu 4
101 Reykjavík

Reykjavík, 1. nóvember 2019

Umsögn Reykjavík DC ehf. um drög að reglugerð um raforkuviðskipti og mælingar, sem kynnt var í samráðsgátt atvinnuvega- og nýsköpunarráðuneytisins þann 19. september 2019

Af hálfu Reykjavík DC ehf., sem rekur netþjónabú sem hefja mun starfsemi í ársbyrjun 2020, er hér með komið á framfæri ábendingum og gerðar athugasemdir við skilgreiningu á hugtakinu „stórnotandi“ í drögum að reglugerð um raforkuviðskipti og mælingar (hér eftir einnig „reglugerðardrögin“), en hugtakið er skilgreint svo í reglugerðardrögunum: „Notandi sem notar innan þriggja ára á einum stað a.m.k. 80 GWst á ári“.

Er skilgreining á hugtakinu „stórnotandi“ í reglugerðardrögunum til samræmis við skilgreiningu 17. töluliðar 3. greinar raforkulaga nr. 65/2003 (hér eftir „raforkulög“), eins og lögnum var breytt með lögum nr. 19/2011, þegar tekin var upp orkuviðmiðið 80 GWh á ári í stað 14MW afl og árlegan nýtingartíma upp á 8.000 stundir áður.

Var tilgangur með áðurgreindum breytingum sá að gera aðilum sem hafa háan nýtingartíma en voru undir tilgreindum aflmörkum, eins og netþjónabúum, kleift að tengjast við flutningakerfið. Áður höfðu eingöngu stóriðjuver fallið undir skilgreiningu stórnotenda og til að veita minni stórnotendum möguleika á tengingu við flutningakerfið var lagt til að aðlögunartímabil þeirra yrði þrjú ár frá fyrstu afhendingu að telja.

Líkt og fram kemur hér að framan féllu eingöngu stóriðjuver áður undir skilgreiningu stórnotenda en með lögum nr. 19/2011 var ætlunin að fella þar einnig undir minni stórnotendur, eins og netþjónabú. Eftir gildistöku laga nr. 19/2011 hafa nokkur netþjónabú hafið starfsemi á Íslandi og því komin reynsla á starfsemi þeirra.

Af þeirri reynslu má ráða að sá aðlögunartími sem fram kemur í reglugerðardrögunum og raforkulögum sé of stuttur, þar sem netþjónabú sem hefja starfsemi eiga oftast eftir að semja við notendur til lengri tíma og hefur reynslan sýnt að það kann að taka lengri tíma en þrjú ár frá því netþjónabú hefur starfsemi. Er því mælt til þess að aðlögunartími verði lengdur úr þremur árum í sjö ár, eða að áskilin orkuviðmið innan tilgreindra þriggja ára verði lækkuð.

Þá er skilgreining á hugtakinu „stórnotandi“ í reglugerðardrögunum og raforkulögum ekki nægjanlega skýr og kann að koma upp vafi um tímamörkin, þar sem ekki er tilgreint með skýrum hætti hvenær eða fyrir hversu langan tíma innan áskilinna þriggja ára lágmarksnotkun hafi átt sér stað. Samkvæmt því sem fram kemur í greinargerð með lögum nr. 19/2011 er þó ljóst að vísað er til þess að áskilin notkun hafi átt sér fyrir lok tilgreindra þriggja ára tímamarka, þar sem fram kemur í almennum athugasemdum að „aðlögunartímabil þeirra verði þrjú ár frá fyrstu afhendingu að telja“ og í athugasemdum við 1. grein segir: „Hið þriggja ára aðlögunartímabil er frá fyrstu afhendingu raforku að telja, þó að undanskildum uppkeyrslutíma, en að þeim loknum er gert ráð fyrir að viðkomandi kaupandi uppfylli lágmarkskröfur.“

Með vísan til framangreinds er mælt til þess að skilgreining á hugtakinu „stórnotandi“ í reglugerð um raforkuviðskipti og mælingar verði svohljóðandi:

„Stórnotandi: Notandi, sem innan sjö ára frá fyrstu afhendingu raforku að telja, þó að undanskildum uppkeyrslutíma, hefur hafið notkun á einum stað á a.m.k. 80 GWh ár ári.“

Virðingarfyllt,

f.h. Reykjavík DC

A handwritten signature in blue ink, written over a horizontal line. The signature is cursive and appears to read 'Guðmundur J. Stefánsson'.